

O LE SULU SAMOA



EKALESIA FAAPOTOPOTOGA KERISIANO SAMOA
O LE NUSIPEPA FAA-LE-LOTU NA FAAVAEINA I LE T.A. 1839




FAAVAEINA 1839

O LE SULU SAMOA

AOKUSO 2022

email: sulusamoa@cccs.org.ws - Main Office: Ph. 24414, Ext 30 - website: www.cccs.org.ws

192 TAUSAGA I MATANIU FEAGAI MA LE ATA



*Ao Mamalu o le Malo & Masiofo, Laulau a le Fono Tele, Palemia & Kapaneta i Sapapalii
i le Faamanatuina o le 192 tausaga o le Tala Lelei & 60 tausaga Tutoatasi o Samoa*

FAASINO UPU

<i>1. O LE LAUGA</i>	2
<i>2. 192 TAUSAGA O LE TALALELEI</i>	5
<i>3. 130 TAUSAGA O LE 'TAIMANE..</i>	6
<i>4. GALUEGA EFKS SAUANO</i>	6
<i>5. VAIASO TUPULAGA 2022</i>	7
<i>6. TALA MO TAMAITI</i>	7
<i>7. O LE PEROFETA MULIMULI</i>	8
<i>8. LAUGA, 'TAEAO FOU'</i>	11
<i>9. MAI LE TUSI FAITAU ASO</i>	12
<i>10. O E UA FAI I LAGI FOLAUGA</i>	13

O LE LAUGA

Tusi Faitau : F. Tuai – Esoto 14:15-20
F. Fou – Luka 4:1-13

Matua: Esoto 14:15 “*Ona fetalai mai lea o le Alii ia Mose, se a le mea ua e alaga mai ai ia te au? Fai atu i le fanauga a Isaraelu, ia latou o atu pea ia;*”

Manatu Autu: A lelei ona tāpena le asō, o le a manuia taeao.

O le fesili, e faapefea ona tatou tāpenaina le asō? Tatou te tāpenaina ea i le faamautu lelei o nofoaga e nonofo lelei ai o tatou aiga ma a tatou fanau? Pe tatou te tāpenaina lelei ina ia mautu le tamaoaiga o le tino nei, ina ia faamalie ai le loto o le tagata, ma ola fiafia ai i le lalolagi nei? O le tali, e leai. Aisea? E le o le faamamafa lena o loo tautala i ai le Manatu Autu o le lauga. O loo tautala le Autu o le lauga i le tapenaina o le ola faatuatua ma le ola faaleagaga o le tagata. Auā a lelei ona mautu le faavae o le ola faaleagaga, e lē fesiligia le manuia o taeao ma le lumana.

Pe a fua i le tatou vaai i suiga o le soifuaga, ma le olaga o aso nei, ua taumafai le lalolagi ina ia usitai atu le Talalelei i lo latou atamai ma lo latou poto. Ua latou fesiligia ai le atamai ma le poto Silisili ese o le Atua, na ia faia ai le foafoaga o mea uma. Ua moni ai upu o le poto o Solomona, e leai se mea fou i lalo o le la. O mea uma e faatauvaa, e matuā faatauvaa lava. E mavae atu lea auga-tupulaga ma lea auga-tupulaga, a e le mavae le tala o le faaolataga ma le

upu moni a le Atua. E fiu foi le lalolagi e tuufesilisili i lona poto ma lona atamai, e iu vale a mea uma. Peitai, o le tagata e faasiliisili ia te ia le tapenaina o lona soifua faatuatua i le Atua, ma usitai i le taitaiga a le Agaga Paia o le Atua, na pau lena o le auala e maua ai le fiafia ma le olioli loloto i o tatou loto ma agaga, ona mautinoa lea ua manuia taeao ma le lumana.

Silasila foi i le tapenaina e le Atua o Lana faaolataga mai le amataga. Na matagofie mea uma o le foafoaga a le Atua i le tala a Kenese. Peitai, ina ua pa'ū le ulua'i tagata, o iinā sa tatou vaaia ai le Atua alofa faamaoni i Lana tagata na fai. Auā sa to'ilalo le ulua'i tagata, ina ua taumafai e tapena lona loto i tuinanauga o le tino. O le ola mana'ona'o, o le ola fiasili, o le ola fia pule, o le ola fia Atua, o le ituaiga olaga lena na faiaina ai le ulua'i tagata i faaosooosoga a Satani, ma ua afaina ai le lalolagi i le ola agasala. E pei ona ta'ua i le mataupu e tolū o le tusi a Kenese, o iinā ua tatou iloa ai le Atua alofa faamaoni, ua ia valoia ai le ata o le Mesia i le lumana, e fanau le tama na te tu'imomomoina le ulu o le gata. O le tapenaga e lei mamasagia i le finagalo paia o le Atua, lana tagata na fai, ina ia toe tapena le ola faatuatua, ma le ola faaleagaga o le tagata, ina ia maua le ola e faavavau a taeao ma le lumana.

E faapena le ata o le faaolataga e pei ona ta'ua i le tusi a Esoto. O le tala malamalama, ma o se tala ua lauvivilu ai le faalogo a le au kerisiano. O le tala o le faaolataga mo le nuu o Isaraelu. O le tala i le alofa laveai o le Atua, le aveeseina mai o Lona nuu paia, mai le faapologaina i lima sauā o le tupu o Farao. E fia tulituliloa pe a le fetalaiga a le Atua na fai ia Mose, e pei ona ta'ua i upu o le matua. “*Fai atu i le fanauga a Isaraelu ia latou o atu pea ia.*” O se fetalaiga tu'u sa'o, o loo atagia mai ai le tāpenaina e le Atua o le ola faatuatua o Mose ma le nuu o Isaraelu. E lē manaomia le ola solomuli. Auā o le ola solomuli, o le ata o le ola palaai, o le ata o le ola lē faatuatua, o le ata o le ola masalosalo, faatasi ai ma le ola faavaivai, ma le ola lē talitonu i lo latou Atua moni. A e manaomia le ola talitonu ma faatuatua o Isaraelu, o le Atua na afua ai ona faatupu lenei malaga. O le Atua na Ia faatupuina le faama'a'aina o le loto o Farao. O le Atua foi na faatupuina le mafuaaga o lenei tuliloaga. Aisea? Ina ia faailoa ia Farao ma le nuu o Aikupito, le Silisili ese o le Atua o Isaraelu. Ia iloa ai e Aikupito, e leai se isi atua, e sili

atu nai lo le Atua o Israel, o le Atua o le Ola e oo i le faavavau. E lē o se Atua oti, a e o le Atua Ola. E pei lava o le fetalaiga a le Atua sa fai ia Mose. A fesili ane Israel, po o ai na auina atu oe, ia e fai atu i ai, “*O A'U O LĒ OLA, O LOO OLA LAVA.*” E lē gata o le fa'aaliga o le mana o le Atua ina ia iloa ai e Farao ma Aikupito le Atua mamana ma le silisili ese, a e o le ata foi lena o le tapenaina e le Atua o loto o le nuu o Israel, ia tumau i le faatuatua. Auā a mausalī le tapenaina o latou loto i le ola faatuatua, e manuia le lumanai e ala i le faataunuina o le latou faigamalaga i le nuu folafolaina. E pei e foliga mai na oo ia Mose le tau faavaivai, pei o le fesili o loo i ai i upu o le matua, e faapea, “***se a le mea ua e alaga mai ai ia te a'u?***”

E foliga mai i le fetalaiga a le Atua, e lē tatau ona toe alaga atu Mose ia te ia. Aisea? Auā foi ua uma ona la faatinoina ma lona uso o Arona vavega i le to'oto'o. O iinā sa tatau ona vaai atu loa Mose o le sami ulaula ua fesagai ma latou, ua tatau loa ona sii lona to'oto'o ma le faatuatua e faia e lona Atua vavega. Peitai o le fesili mai o le Atua, o le ata o le tapenaina pea e le Atua o le loto o le taitai, aemaise loto o le nuu. O le to'oto'o o le faailoga foi lea o le auai o le Atua. Auā o le isi lea mea sa i totonu o le atolaau a le Atua, o le to'oto'o. E pei foi ona fa'aalia e le Atua Lona mana i le taimi na tuliloa mai ai e Farao le nuu o Israel. Na auina mai ai e le Atua Lona agelu ma ta'ita'i le nuu o le Atua i le malamalamā i le pito i luma, a o tua o le ao pogisa ina ia faapogisaina le vaai mai o Aikupito ia Israel. O le ao o le faailoga o le auai o le Atua (God's presence).

Lea ua tatou vaaia le savavali o Israel i le ilititai mātūtū, a e ua vavae e le Atua le Mami Ulaula i le matagi. Ina ua taunuu Israel i le isi itu o le Sami Ulaula, na toe faafoi e le Atua le sami i le mea sa i ai, ma ua lafoa'iina ai kariota a Farao ma ana a'u, ma ua feoti ai i latou i le sami. Talofa i le tagata e tapena lava e ia lona ia ola faamauluga e aunoa ma le faalagolago i le tapenaga faaleagaga a le Atua. O le afu lea o Farao, o le i'u i le oti. O le ata foi lena o le tagata e faalagolago i lona malosi ma lona faasausili e i'u i le oti. Ao le tagata e faalagolago i le tapenaina e le Atua o lona ola faaleagaga, e maua le loto maulalo ma faaeaina. O le savavali o Israel i le ilititai mātūtū, o le faailoga o le papatisoga o le nuu o le Atua e Lona mana ina ia tapenaina ai e le Atua

agaga o Lona nuu, auā le savaliga tele i le vao mo le fa sefulu tausaga. O le ata o le tapenaga mo le manuia i le nuu folafolaina.

E faapena foi le ata o loo tautala i ai le tusi a Luka. O lea faatoa mae'a le papatisoina e Ioane o lo tatou Alii. Lea ua taunuu le valoaga na valoia mai i le tusi a Kenese o lona mataupu e tolu. E fanau le tama na te tu'imomoina le ulu o le gata. E ui lava ina o tatou iloa ma malamalamā o Iesu o le Atua lava ia, peitai o lea ua liu tino tagata le Upu. O lona uiga ua ola foi i le olaga faa le tagata ina ia faasino tagata i le Atua. O le afio mai la o Iesu, ma papatisoina e Ioane, o le papatisoga sei tapena ai e le Atua Lona atalii pele, auā tofotofoga o le a tototofoina ai e le tiapolo. Pei ona ta'ua e Luka le faaosoosoina o Iesu i le vao i aso e fagafulu. Ua iloa e le tiapolo ua atoa le fagafulu o aso e lei taumafa Iesu, ona ia faaosoosoina lea o Iesu, ina ia faaliu areto ma'a pe afai o ia o le Alo o le Atua, peitai ua tali Iesu, “***e lē na'o mea'ai e ola ai le tagata.***” E lē o iloa e satani o Iesu o ia lava o le Areto o le Ola. O ia lava lea na fafagaina le nuu o Israel i le togavao i le manai mai le lagī. Ua ave foi e Satani ia Iesu i le mauga maualuga, ma faaosooso i lo tatou Alii, ma fai mai ia Iesu e tuuina atu ia te Ia malo uma o le lalolagi pe afai e ifo atu lo tatou Alii ia te ia. A ua fetalai Iesu ia Satani, “***E te ifo atu i le Alii lou Atua, ua na o ia lava e te auaua i ai.***” Ua maea lea ona ia ave lea o Iesu ua faatū i le tumutumu o le malumalu ma fai atu i lo tatou Alii, “***Afai o oe o le Alo o le Atua, ina oso ia oe i lalo o le mea nei,*** auā ua tusia ‘***e poloai o ia i ana agelu ia te oe e tausi ia te oe, latou te ave ia te oe i o latou lima nei tui'a lou vae i se maa'***’ A ua tali atu Iesu, “***aua e te tofotofo i le Alii lou Atua.***”

O ia faaosoosoga uma e le'i faaina ai Iesu, aisea? Auā foi ua uma ona tapena e le Atua lona Alo, auā le faaolataga mo le lalolagi agasala. O le Atua e agai pea i luma le tapenaina o le ola faatuatua o le tagata. O le tapenaina o lona Alo, e lei ui i ni ala faigofie. E pei foi o le tapenaina o le faaolataga mo Israel mai le o ese mai Aikupito, e lei ui i ni ala faigofie. O le ata lafoia lena mai le Feagaiga Tuai lea ua faataunuina i le Feagaiga Fou. O le manumalo o Iesu i faaosoosoga a satani, o le ata vaaia lena o le faatuatua o le tagata kerisiano e ao ona ola ma soifua ai.

Le paia e, o le Eklesia ma i latou urning o loo faiataina lenei avefeau “**Sulu Samoa**,” o le feau faaleagaga lena o lenei masina e lu’i ai lo tatou ola faatuatua i le Atua ma Lona finagalo. Fai mai le manatu autu, “**A lelei ona tāpena le asō, o le a manuia taeao.**” E lē o se tapenaga faaletino o loo tausinio i ai le au kerisiano, a e o le tapenaga faaleagaga ina ia matuā malosi ma mautū lo tatou ola faatuatua i le Atua, ona tatou mautinoa lea ua manuia le lumanai. O se toe faamanatu mo le Eklesia ma ona tupulaga lalovaoa. Ua tatou vaaia le tai faana’e mai o suiga o loo i ai lenei seneturi. Aemaise ai le maoa’e o le poto ma le atamai o le lalolagi ua i ai nei. E le gata o tekonomosi, o le tamaoaiga ua i ai nei le lalolagi, ua matuā saoasaoa ai le fiafia o le lalolagi e uai atu ai lo latou ola. Ua manatu le lalolagi o le sa’o lea o le olaga ua tele tuge, ua faigofie mea uma i ala o fesootaiga. Peitai o ina ua taitaiina ai le olaga o le tagata i le malaia. Auā foi ua ua’i atu i ai le loto.

E pei o se faataitaiga, o ala o fesootaiga faaneionapo, o loo lelei pe a faatino lelei. A e ‘aua nei avea i ai lo tatou faatuatuaga, e pei o Api o foliga (face book). O le upu moni ua tele ina leiloloa olaga o tagata i Api o foliga. Aisea? Ua fai ai misaaga ma talafo ai upu le talafeagai. Ua leai se amio faakerisiano. O lona uiga e lē o le Api lena e tapenaina lou ola faaleagaga. A e a tapena e le Api o foliga o le Atua, o le Tusi Paia lea, e sili ona manuia ai le olaga o le tagata. Aiseā, auā o loo tapena e le Agaga o le Atua i mea lelei, ma ona foliga matagofie na faia ai le tagata. O le Tusi Paia o le Api lena o foliga e ao ona tatou faiataua i aso uma. E tapena ai olaga o tagata ua leiloloa i lenei vaitau ona ua ave le faamamafa i suiga o le olaga o loo ua i ai nei.

Ua tele le mau talaiga ua sau i lenei vaitaimi, ua tosina i ai loto o tupulaga ma le tele o isi tagata lolotu. Aisea? Auā foi ua tosina i le vaaiga i fafo i le faatinoina o tapuaiga, a ua fuamoia le ola tapuai ma le faamaoni i le Atua. Ona pei lava lea le olaga o le tagata, o le soifuaga o le au Faresaio, e fiafia e tausi le mamalu o le tulafono a e lē ola ai. E fiafia e vivii mai e tagata lo latou ola tapuai, a e matuā fuamoia ma se alofa. E faapena le lalolagi ua i ai nei, e fiafia e tapuai i le vaaiga o mata, a e ua leai se tapuai ma le faamaoni i le loto. Ua fuamoia ma se alofa. O lenei vaitau ua tele faalavelave tutupu, o le malosi o le fasioti tagata, o le faatupulaia o le leaga o amioga tupulaga, a o le fesili, e faape’ī ona tatou foia ia faafitauli? E leai lava

se isi auala e foia ai, ua na o le tapena o auala faaleagaga, e pei o A’oga Tusi Paia, o mafutaga faakerisiano, ina ia fafaga ai le ola faaleagaga o tagata ina tapenaina pea lo latou ola faatuatua ina ia maua ai e tagata le manuia i le ola e faavavau. Ia ola le tagata ma le mautinoa e lē se taimi umi le soifua ma le ola i le lalolagi nei. E lē faia foi lenei lalolagi mo tatou. A e ao ina tapenaina le ola faatuatua, i soo se auala faaleagaga ua faailoa mai e le Agaga o le Atua, ina ia mausali ai le ola faatuatua ma le ola talitonu o le tagata i le Atua. A lelei ona tāpena le asō, o le a manuia taeao ma le lumanai e ala i le ola e faavavau. O le fu’ā taualuga lena na afio mai ai Keriso, ina ia tapena fa’ā-fafine toaga le ola faatuatua o lana fanau ina ia latou maua le ola e faavavau. Ua tuua ai lona mamalu ma lona silisili ese, a e ua afio mai lava e militino ma le tagata agasala, ina ia toe tapena le ola toilalo o le tagata, ina ia salamō ma faatuatua ia te ia, ona mautinoa lea ua maua le sini o le faamoemoe, o le ola e faavavau.

Ia manuia tele le galuega tala’i a le Eklesia, e ala i lenei Nusipepa faaleagaga o le ‘SULU SAMOA O LE TALALELEI.’ Manuia foi le sauni atu o le Fono Tele a le Eklesia i le masina fou o Setema o lenei tausaga 2022. Ona o Iesu, Amene.

*Saunia Susuga Petaia Tuifao (FS),
EFKS Southside,
Matagaluega KUINISELANI.*

MANUIA LE ASO SA TAMA 2022

O le Aso Sa o Tama o se tasi o aso faailogaina e le EFKS i tausaga taitasi, i le Aso Sa lona lua o le masina o Aokuso; o le tausaga nei na faailoga ai i le Aso Sa 14 Aokuso, ma na faamamaluina e Eklesia taitasi i Samoa ma Amerika Samoa. O malo Amerika (aofia ai ma Hawaii) e faamamalu le Aso Tama i le Aso Sa lona tolu o Iuni, a o Ausetalia, Niu Sila ma Fiti, o le Aso Sa muamua o Setema. O aso foi ia e faamamaluina ai e Aulotu uma o le EFKS i ia atunu, le Aso Sa Tama. Mo Samoa, o le tausaga 2005 na amata ai ona faamamalu atili le Aso Tama, ina ua avea le Aso Gafua e sosoo ai ma aso malolo, e pei ona faia foi i Aso Tina ma Lotu Tamaiti. E laualuga le agaga o le viiga ma le faafetai i le Atua, ona o ana meaalofa e ala mai i Tama o aiga ma Aulotu taitasi.

192 TAUSAGA O LE TALA LELEI, 113 TAUSAGA O LE 'TAEAO FOU', 60 TAUSAGA O LE EFKS & TUTOATASI

O le aso ma le filiga, o le aso foi ma le mataigatila. E tele foi taeao, a e le lau taeao. O le Aso Lulu 24 Aokuso 2022, se tasi o taeao fou mo le EFKS Sapapalii, tainane le EFKS Aoao ma le Malo Samoa. O le aso ma le taeao, na faia ai le Sauniga Lotu mamalu, e faamanatu faatasi ai le taunu mai o le Tala Lelei i Mataniu Feagai ma le Ata i le 1830, ma le Tutoatasi o le Malo Samoa i le 1962. O le sauniga lotu lenei, ua ta'ua o le Taeao Fou, e masani ai le afioaga/EFKS Sapapalii i tausaga taitasi, talu mai le tausaga 1909; o le Lotu lona 113 lenei talu ona amata mai lenei sauniga e faamanatu ai le taunu mai o le Tala Lelei. Peitai ane, o lenei tausaga ua i ai le faatofalaiga a le Faigamalo, ina ia avea o se vaega o le Faamanatuina o lona 60 tausaga Tutoatasi, le faamamaluina o aso ma taeao na taunu mai ai ulua'i ave feau o le Tala Lelei a ituaiga taitasi - LMS, Metotisi, Katoliko ma isi.

O lenei sauniga lotu sa ta'ita'i e le afioga Taitaifono Fono Tele, susuga Iosefa Atapana Uilelea FT o ia foi na saunia le Lauga. O le afioga Taitaifono Komiti Au Toeaina, susuga Asotasi Gu Time FT na fatauina le Tusi Paia (Failauga 9:13-18), a o le afioga Sui Taitaifono Fono Tele, susuga Tunumoso S. Iosia FT na saunia Talosaga. O viiga o le Atua na saunia lelei e le Aufaipese EFKS Sapapalii. O le sauniga na faatumulua i le auai ai o le Ao mamalu o le Malo ma lana masiofo, afioga i le Tamaitai Palemia ma lana Kapaneta, le Fofoga Fetalai ma le toatele o Sui Faipule o le Palemene, o Toeaina ma Faifeau ma faletua, o lupe faalele uo ma aiga a le afioaga o Sapapalii.

O le susuga Esera Auatama Esera FS le faafeagaiga taulagi a Sapapalii na saunia le Tala o le Taeao Fou. O se tasi o Uili FS ma Faimalo FS na fatauina le Lotu lenei i le tausaga 1909, ina ia manatua ai pea mea tetele ua faia e le Atua mo le afioaga - ua filifilia e le Atua ona augatama, ua faapaia ona lauelele, ua fa'aaoga augatupulaga tuufaasolo mai, mo le Atua ma le Tala Lelei ia Jesu Keriso. Ua ta'ua o le Taeao Fou, ina ua tele taeao iloga o le atunu, o taeao o le faapaupau ma le toto masa'a, o taeao o le pouliuli ma le ola faanuupo; a o le Taeao Fou, o le taeao ina ua suluia e 'ave malolosi o le malamalamo o le Tala Lelei. O lenei foi sauniga e fai ai taulaga o le loto faafetai i le Atua, faapea le atiina a'e o Lana Eklesia. E tofu sao aiga ma tagata uma e faafo'i atu i le Atua.

O le tausaga 2018 na aloaia ai le faatuina o lenei lava sauniga i Aukilani Niu Sila, mo alo ma fanau ma aiga uma o loo aumau i lena atunu, ma sa faia foi i lea lava aso ma le taimi e pei ona sa faia i Samoa. O le finagalo o le nuu, e le faaluaina le EFKS e se isi lotu. E avanoa tagata uma e tapuai e tusa ma lana aia saoloto, peita'i a e ao ona tau savali i fafo atu ma Sapapalii e tapua'i ai. Pe a fai foi galuega a le EFKS, e aofia ma galulue faatasi ai tagata uma o isi ituaiga. Na molimauina le tala faasolo o le aufaigaluega misionare ma faifeau na galulue i le afioaga o le Malietoa ma Usoalii, amata mai ia Misi Ale se'ia oo mai nei i le susuga Esera ma Tamara, e to'a 19 i latou. E 178 le aofa'i o lupe faalele ma le 168 faletua, o tama fanau a Sapapalii ua ofoina le soifua mo le galuega paia a le Atua, amata mai ia Malietoa Moli, Malietoa Talavou seia oo mai nei i le afioga Taitaifono ma le Sui Taitaifono o le Fono Tele 2022.

O se tasi o vaega taua o lenei sauniga, na tolauauina ai faiga taulaga na ma'au i ai le paia o le Eklesia ma le mamalu o le Malo, tainane lupe faalele ma aiga taitasi i lea sauniga. E silia ma le \$260,000 le aofa'i o faiga taulaga i lea lava taeao; e ese ai le \$100,000 na foa'i e alo ma fanau mai Niu Sila, mo le faatinoga o lenei sauniga faapitoa. E faaopoopo i ai meaalofa mai le EFKS ma le Malo Samoa, e tusa o le taliaina o lenei faamoemoe. O le afioga i le Tamaitai Palemia, Hon. Fiame Naomi Mataafa na saunoa e faafetaia le Eklesia ma le afioaga, ma faae'e faamanuiaga e tusa o le talileleia o lenei fuafuaga. O le faai'uga na faailoa ai e le susuga i le Taitai o le Sauniga e faapea, o lenei foi sauniga ua faamanatu ai le 60 tausaga talu ona suia le igoa o le Eklesia, mai le LMS i le Eklesia Faapotopotoga Kerisiano Samoa, e pei ona sa aloaia ma amata mai le tausaga 1962.

O le mae'a ai o le sauniga mamalu, na sisiina a'e ai le tagavai o le saolotoga, e lana afioga le Tamaitai Palemia, i luma lava o le Malumalu Mataniu Feagai ma le Ata. Ona mapu atu lea o le mamalu tele i le Mataniu Feagai ma le Ata Hall, sa faafafiaina ai e le Pulega Palauli/EFKS Vailoa, o le Autalavou EFKS Iva, ma le Autalavou EFKS Sapapalii. Na taualuga le aso i le tausamiga ma fa'aaloaloga maualuluga na faafao i ai aao o le Faafeagaiga ma le Eklesia, le afioaga i Sapapalii. Na lagi le 'Lota Nuu', lulu aao tuuama le fua ma tatala le filialii, ina ua mae'a faia le tatalo faamanuia e le susuga Iosefa A. Uilelea FT.

130 TAUSAGA, ‘TAIMANE O LE VASA LAOLAO’

O le Aso Sa 21 Aokuso 2022 na faia ai le Sauniga Lotu faapitoa a le EFKS Apia, e faamanatu ai le 130 tausaga o le malumalu tapua’i, ua faaigoa o le ‘Taimane o le Vasa Laolao’. O le Toeaina o le Pulega Apia Sisifo, susuga Efu Efu FT na ta’ita’iina lea sauniga mamalu na faatumulia i le toatele o le afioaga/ EFKS Apia, o uo ma aiga. O le faafeagaiga taulagi a le EFKS Apia, susuga Dr. Latu Latai FS na saunoa e tusa o le Tala Faasolopito o lenei malumalu faapea le galuega a le Atua i totonus o le afioaga o Alo Sina ma le Fuaifale o Salevalasi, le mamalu o le Faletolu ma le Vainalepa ma upu ia Tuisamau.

O le ulua’i malumalu na fausia lava i le nofoaga o loo i ai nei, e lata fesaga’i tonu ma le ava e ulufale mai ai vaa i totonus o le taulaga i Apia. Na amata fausia i le aso 31 Aokuso 1892 e Nemaia FS ma le faletua ia Noema, a e na faato’ a faapa’iaina i le ono tausaga mulimuli ane i le aso 8 Me 1898; o le tau na fausia ai lea ulua’i malumalu e £6,017.20. O le 19 tausaga mulimuli ane i le 1917, na mu ai le fale tifaga tele o le Tivoli sa tu latalata i le malumalu. Ma o loo faamauina i le Api/Tala o le Galuega le tau alaga ai o le afioga Seumanutafa Moepogai i ona tagata, ina ia ‘lavea’i le malumalu, tusa pe faa’umatia ai lo latou ola”. O le tausaga 1948 na faamanatu ai lona 50 tausaga (1898-1948), ma toe faaleleia atili ai e le susuga Tapeni Ioelu FS. O le tausaga 2006 sa toe fai ai le isi galuega faalelei e le susuga Utufua Naseri FT ma Taioaopo, lea e oo mai nei na teuteuina saunia mo le faamanatuina o lona 130 tausaga.

Na faamauina le Taulaga na lafo i lea sauniga e tusa ma le \$181,000+. Na lagi le vii o le ‘Taimane o le Vasa Laolao’ na fatuina e le afioga Asiata Melvin Solomona, ona faafelelea’i lea o paluni felanua’i e 130 e faailoga ai le aso faamanatu, ina ua mae’ a le sauniga. Ia silafia e tusa ma le tala faasolopito o le galuega faamisionare a Ioane Viliamu, o lana malaga atu e faa-talalelei nisi motu o le Pasefika na tagatavaleina ma ‘aina ai i la’ua ma se tasi uso misionare o James Harris, i le motu o Eromanga i Niu Eperite (ua igoa o Vanuatu i aso nei). Mulimuli ane ona toe aumaia lea o ivi o Ioane Viliamu i Samoa, ma o loo tanumia i lalo ifo o le faitoto’ a o le malumalu Taimane o le Vasa Laolao. O loo faatuina foi le maa faamanatu mo le misionare e faafesaga’i ma le malumalu, faapea le ulua’i maota fogafale ono i Samoa, le Maota o le Ioane Viliamu a le EFKS.

FAAPA’IA GALUEGA EFKS SAUANO

O se tasi o galuega tele na faapaiaina i lenei masina i le Aso Faraile 26, o Maota o le Galuega (Hall) faatasi ma le Maota o le Faafeagaiga, o le EFKS Sauano i Fagaloa, o galulue ai le susuga Ieti Tofaeono FS ma le faletua ia Manu’ula. O le faletua o le Taitaifono Komiti Au Toeaina, le afioga Savaliga Asotasi Gu Time na ia ooti le lipine e aloaia ai le tatalaina o lenei galuega matagofie, o maota tetele e lua. O le sauniga na ta’ita’i e le susuga Asotasi Gu Time FT, ma na saunia foi le Upu faamalosi’ au mo le Aulotu, a o le viiga o le Atua i lo latou soifua tautua ma le ola faatuatua e galulue mo le Ekalesia. O le afioga i le Taitaifono Fono Tele, susuga Iosefa Atapana Uilelea FT, na saunia talosaga ma le tatalo e faapaia ai le galuega ua ofoina atu mo le Atua. O ia foi na saunoa fai ma sui o le Ekalesia Aoao e molioo le faamalo ma le faafetai i le susuga faafeagaiga ma le faletua faapea le paia o le Ekalesia i Sauano, mo le atina’ e ma le galuega mae’ ae’ a ua molimauna. Ia fai ma viiga o le Atua, ma ia faamanuia mai o Ia e tusa o le soifua ofoina atu mo Ia. Ona ia tauaao atu lea o le meaalofa a le Ekalesia e \$20,000 e fesoasoani i le totogiina o le tau o lenei galuega.

O le susuga lava i le faafeagaiga ia Ieti Tofaeono FS na saunia le Tala o le Galuega sa amata afuafua mai ia Iuni 2021. O a latou sailiga tupe i auala masani o Tausala, Bingo, Lafolafoga ma Atina’ e na maua ai le \$30,000+, faatasi ai ma le fesoasoani mai a le ADRA e \$49,800 na maua ai le tupe faavae \$70,000+ o le galuega. O le afioga i le Matuaofaiva ia Te’o Timoteo e ana le konekarate sa fausia le galuega, a o le Bluebird Lumber na maua mai ai le avanoa mo oloa e \$137,000; sa fesoasoani foi le Toomaga \$50,000 mai le Ekalesia. O le tau atoa o lenei galuega e **\$299,800;** ma e tele le ma’au na foa’i e le mamalu o le aufaigaluega ma le auvalaaulia i lea aso, e faaitiitia ai se aitalafu ma Toomaga o totoe.

O le susuga Ieti (Siumu) ma le faletua ia Manu’ula (Tanugamanono) na amata galulue i Sauano ia Iulai 2006, na valaauina a o galue i le Matagaluega A’oa’oga Kerisiano o le Ofisa o Apia Sasa’ e. Sa avea i la’ua ma Failautusi o le Matagaluega Apia Sasa’ e se’ia oo mai i le tausaga talu ai 2021, ina ua vaeluaina ai le Matagaluega, ma fanau mai ai le Matagaluega Vaimauga. Na taualuga le aso tele i le tausamiga ma fa’aloalogia maualuluga mo le Laulau Fono Tele, Laulau KAT ma le au valaaulia. MALO!

AUTALAVOU EFKSILE VAIASO TUPULAGA 2022

O le Vaiaso o Tupulaga Faavaomalo e faamamaluina i tausaga taitasi i le masina o Aokuso. O le vaiasosa e taulamua ai le Malo, a e lagolagoina e Ekalesia Kerisiano uma, i polokalame atia'e mo le manuia o alo ma fanau talavou a le atunu. O le tausaga nei, sa faapea foi ona faamamaluina ai lea Vaiaso o Tupulaga, ma na valaaulia ai nisi o Autalavou a le EFKS i le tausinioga o le Finauga a Autalavou. O le polokalame sa taulamua ai le Asosi o le Soifua Maloloina (Samoa Family Health). O Autalavou e 5 mai EFKS Vavau, Ululoloa & Siusega, Faleasiu, Lalomauga ma Apolima-tai na filifilia mai le tatou Ekalesia, faatasi ma le Autalavou Metotisi e tasi mai Salamumu, o le Autalavou e tasi mai le Aso Fitu ma le vaega o le Team Challenge e atoa i ai le 8 o Autalavou sa fai le tausinioga.

I le taamilosaga muamua na manumalo ai Vavau ia Lalomauga, manumalo Ululoloa ma Siusega ia Apolima-tai, Salamumu na manumalo ia Faleasiu, ao le Team Challenge ia SDA. O le aso lona lua na finau ai Salamumu (lagolago) ma Ululoloa ma Siusega (tetei) i le mataupu - Ua tatau ona soloia le 10%. O le isi mataupu - O la'e i o tamaita'i o fai ma faapogai o soligatufono - sa lagolago i ai Lalomauga a e tetei ai Vavau ma manumalo ai. Ona taualuga lea i le aso mulimuli, le sailiga o le siamupini i le va o Autalavou EFKS Vavau na tetei, ma le EFKS Ululoloa ma Siusega na lagolago i le mataupu - O le tekonomosi ma telefoni ua fai ma pogai o le tele o faafitaui i tupulaga i aso nei - na manumalo ai le Autalavou Vavau i se tausinioga vavalalata i nai togi itiiti. O le 'au a Vavau na ta'ita'i e Hitila Lynn Enesa Siaitu, lagolago ai Vasana Paisa Oloialii, Tumau Tanielu ma Naomi Faipauna. O le 'au a Ululoloa ma Siusega na fausia e tamaita'i, ta'ita'i e Nofoaga Lisale Tuioti, lagolago ai Mata Laufale ma Arasiolepanona Lisale Tuioti.

O afioga i Faamasino sa filifilia i ai le sui mai le Ofisa Faiga Palota, o le sui mai le Matagaluega Tina ma Tamaitai ma Aga Fesootai, o le Malu o le Malo, o le Failautusi Ekalesia Soo Faatasi, ma nisi o Tina Penisione EFKS. O le Ofisa o le Komesina Ausetalia le lagolago autu e faatupeina lenei faamoemoe i tausaga taitasi, ma sa faapea foi i le tausaga nei. O le faamoemoe maualuga o lenei vaiaso faapitoa, o le tapenaina o tupulaga talavou e atia'e manuia olaga mo le ta'ita'iga o aiga nuu ma le malo, tainane le Malo Keriso, i le taimi nei aemaise ai le lumana'i.

TALA MO TAMAITI

O le tala mo outou le fanau e faavae mai le tala i le foaoaga o le lalolagi i le amataga. Ina ua uma ona faia le lagi ma le lalolagi, ona sauni atu lea o le Atua o le a taualuga lana galuega, i le faiga o le tagata. A o fai Lana tonu pe faapefea ona faia le tagata, sa faalogologo ai ma lagona atu e isi mea na faia, pei o le lefulefu, le iliili, le 'ea ma isi. Sa latou talatalanoa po o ai o le a fa'aaoga e le Atua e fausia ai le tagata. Na faapea ane le lefulefu, o ia e tatau ona faia ai le tino o le tagata; ae peitai e leai, e le'i filifilia le lefulefu. Sa faapena foi i le tele o isi elemeni, na manatu lava le elemeni ia i lona agavaa, e tatau ai ona fa'aaoga; peitai e le'i filifilia i latou. O le faai'uga a le Atua, na filifilia ai le palapala, po o le eleele, e fausia ai le tagata. O le igoa lea o le 'palapala' ma le 'eleele', ua faaigoa ai le 'toto' o le tagata. Pe afai e manu'a ma maligi le toto, ona faapea lea, ua masa'a le palapala, ua tafe le eleele. Sa mimita ma faamaualuga le palapala, aua soo se tagata lava e oti, e tanumia i totonu o le palapala, ma toe liu palapala uma ai. E leai se tagata e sao mai ai, talu le ulua'i tagata na fai.

Peita'i ua oo i le isi aso, ua vaai atu le palapala ia Iesu, e tulaga ese lava lenei tagata o Iesu, ma sa iloa e le palapala, na te le mafai ona faatoilaloina le malosi o Iesu, ma e le mafai foi ona ia aumaia e faaliu palapala. Ona fai atu lea i ai o le 'papa'i le palapala, "Tuu mai la ia te a'u le tagata lena o Iesu, ou te mafai ona taofi ma tanumia i totonu o a'u o le papa, i lo'u malosi ma lo'u malo." Ona faapena lea ona fai, ua maliu Iesu ma tanumia i totonu o le papa. Peita'i, e tolu aso na i ai Iesu i totonu o le tuugamau, a e toe tu manumalo. Ua le mafai e le papa ona taofi le mana ma le paoa o Iesu, e pei foi ona siilima mai le palapala ma le eleele, ma soo se mea na faia, e leai se mea e tasi, poo mea uma e tuu faatasi, e oo i le oti, na te mafai ona faatoilaloina Iesu. E faapena foi le alofa o Iesu mo outou le fanau, e leai se mea e tasi na te taofia mo outou.

Saunia: Susuga Isaako Sefo FS, EFKS Letui

O LE PEROFETA MULIMULI

(*O le tala faasolo faafagogo faaSamoaina mai le tusi ‘The Last Oracle’ tusia e James Rollins*)

O Mapeletope i le isi itu na o le tu’inanaau faapolokiki, ma le soona alu faatauaso e faamalie tu’inanauga. E le’i taitai ona talitonu i ai Iuri.

O le leiloa o Sasa, na manaomia ai e Iuri ni paaga i laueelele o Amerika.

Na faatonuina o ia e feiloai ma Foma’i Iakopo Segi, o se foma’i o neura o le tagata ma se sui o le li’o pito i totonu, e faia le fuafuaga.

O le a faatasi atu i ai ma se tasi.

Se isi e mafai ona fesoasoani, na logoina atu ai o ia. Na ta’uina atu ia Iuri faatonuga ma’oti ma le manino e tusa o le nofoaga o le a faia ai le feiloaiga. Na amata savali ifo i sitepu. O le itula lenei, ua loka uma faitotoa. E ititi potu su’esu’e i lalo i le fogafale lenei. A o ia savali atu, na taia ma mū lona isu i manogi o vailaau faamamā lavalava. O tua atu o se tasi o faitotoa, na ia lagona atu ai se leo e masani ai, le tagi lemū a se manukī. Atonu o iinei o loo teu ai manu o le su’esu’ega, ua tuufua aunoa ma se tagata faigaluega i lenei itula.

Na ia siaki le numera o le potu.

B-2 340.

Na ia maua le faitotoa tino tioata ma tu’itu’i ai. Na pasi ane se ataata, ma e le’i umi a e mataala mai le faitotoa.

“Foma’i Raeva. Faafetai mo lou afio mai.”

E le’i maua lelei e Iuri foliga o le tamaloa Asia a o ia liliu ese. Na ia la’ei se peleue pa’epa’e potu su’esu’e i luga a’e o se ofuvae lanu moana. Sa taatia se mata tioata i lona muāulu, peisea’ī ua galo ai. O le potu sa i ai se laulau i le tasi itu o le puipui, a o le isi itu sa i ai se faaputuga o pa uamea. Na onoono mai ai ni isu e fai’ava uliuli i le va o uamea. O le fe’ī magiagia mai o le fela’u o atigilima laiti na musumusu mai totonu o pa. O isumu o le potu suesue. A e leai ni fulufulu, na o a latou ‘ava. Na ta’ita’i atu o ia e le foma’i i se faitoto’ā mataala i le pito i tua. O iina na ia tau atu ai i se ofisa gaogaosā: o se laulau u’amea tumu i pepa ma faila, o se laupapa tusitusi pa’epa’e o loo tusia ai le lisi o le tele o mea e fai, ma se pusa o loo faula’i ai siā mata’eta’e o suavai mo su’esu’ega.

Na faate’ia Iuri ina ua tau atu o i ai se tagata masani o laulauā i tua o le laulau, o i ai se telefoni i lona taliga. O le tamaloa, faasolo atu i lona ogatotonu o le limasefulu, na fa’alia lona tupuaga Sikotilani i lona tino lapo’ā, o ona alafau mūmū, ma le soesā enaena-mūmū ua sele latalata i se auvae aliali mai. O ia lea o

le faauluuluga o le vaega o Iasoni na tofia e fesoasoani i le au Rusia – ma o se aumea ma ue mamae ua leva a Atipale Poleki.

Fomai Tereni Pakepalai.

“O lea ua faato’ā taunu mai o ia,” na fai atu ai le tamaloa i le telefoni, ma lue atu lona ulu ia Iuri. “O le a ou faamalamalamaina tagata uma i le isi itula o i luma.”

Na tape e Makepalai lana telefoni, tu a’e i luga, ma faaloaloa atu lona lima. “Ua uma ona faamalamalamaina a’u i le tulaga o lau mataupu, Iuri. O le maitau atu i le ma’ale’ale o le tulaga o le teine, ua avea ai lenei mataupu o se faamuamua. O le a matou taumafai e saili le teine i le mea e gata ai le mafai.”

Na faatalofa atu Iuri ona toe nofo lea i lalo. E ui ina sa faate’ia, a e na ia lagona le mapu sela ina ua ia maua atu Makepalai iinei. I lalo ifo o lona to’ā faalenatura, sa i ai le mafaufau sogasogā ma le ma’ai i le tamaloa.

“O lona uiga o lena e te malamalama lelei,” na fai atu ai Iuri, “i le tāua o le matou toe maua o le teine? Ma ia vave.”

Na luelue lona ulu. “E fia itulā e mafai ai ona ola pea le teine aunoa ma ana vailaau?”

“E tolusefulu ma le lua.”

“A o anafea lana tui mulimuli?”

“E fitu itula talu ai,” na ia tali tauto’ai atu ai. E tusa lea, na o sina sili ititi atu lava ma le aso e tasi, e tatau ai ona maua mai Sasa.

“Lona uiga e tatau ona faanatinati la tatou gaioiga,” na fai atu ai Makepalai. “E pei ona e masalomia, ua uma ona valaaau mai o Mapeletope ia te a’u. A o le mea foi lena ua ou oo mai ai iinei.”

“Sa ou faapea o loo e i Sineva. E te le’i manatu e te fealua’i faalilolilo? Ia nātia mai le iloa e tagata?”

“Tau lava ina seia oo ina mae’ā mataupu ma Atipale.” Sa faamalō teisi lana pupula ia Iuri. “O le tulaga lena sa i ai. E ui ina sa tatau ona lelei atu le faai’uga. O ia o la’u uō lelei.”

“Ua e silafia e pei ona ou iloa, o Foma’i Poleki sa le’i i ai se avanoa e ola ai mo ni nai aso. Na ou faia le mea e tatau ona fai.”

E le’i i ai se foliga faamalieina ititi o Makepalai.

“Ma afai foi e te manatua,” na faaopoopo atu ai Iuri, “na ou palota tete’ē i le faafeiloa’iina o Fomai Poleki i le amataga.”

Na toe solofa ifo Makepalai i lona nofoa ma le ‘o’ī. “Sa ou manatu lava ma le faamaoni o Atipale o le a faigofie, aemaise ina ua ia iloa le poloketi i le taimi muamua. O le upu moni, o le faateleina atili o le galuega na fai i lona olaga. Ma o le manatu atu i le lamatia sa ia aumai, na o le pau lava le isi mea e fai – O le isi faamimigi faanoanoa o tau’au.

O Fomai Poleki sa fai lava sina latalata o lana galue i le fatu o le poloketi faa-su’esu’ega. E latalata atu nai lo le silafia e Makepalai. Na tuu mai ai ia te i la’ua o filifiliga e lua: o le toe faa-faigaluega o ia, po o le soloi’ese o ia.

Na i’u leaga le toe faafaigaluega...na matua’i malaia lava.

Ina ua aumaia i le Ualeni, na i’u ane ina ua sola le tamaloa ma faamaumauga tāua. Sa le’i i ai se isi faaiuga, nai lo le saili faatapito o le tamaloa.

“Talofa e, ia Atipale i le mea na oo i ai,” o le tala lea a Iuri.

Ma e moni lava lona lagona faanoanoa. O le maliu o Fomai Poleki, e ui ina ua tatau ai, a e o loo ua misia, ma o se toesea tele. Ia te ia lava, e tele se faaeaina ma faamanuiaga sa maua e le polōfesa, e oo lava i lona matuā latalata i le faailoaina o mea lilo a Rusia sa natia mai ia Amerika. Ua manino mai sa manatu faatauvaa itu uma e lua, i le tāua ma le aogā faapuna’oa o Foma’i Poleki.

E lē gata o le taimi e le’i pu’ea o ia, a e faapea foi mulimuli ane.

Sa fa’aaaua pea Iuri, “E tusa ma le mataupu i le teine ua leiloa –”

Na faalavelave atu Makepalai. “Ou te taofi o ia o se tasi o sui autū o la outou Omeka.”

Na lue atu lona ulu. “Sa faata’ita’i i le laasaga o le ivasefulu fitu pasene le maualuga. E tāua tele le teine i la tatou poloketi. Mo a tatou galuega uma. Ou te popole e lē o malamalamā Mapeletope i le ma’ale’ale o le paleni manaomia, ina ia faatumauina le ola ma le gaoioi pea o se tagata autu o Omeka.”

Na valuvalu e Makepalai le pou o lona isu. “I le ma talanoaga ma Mapeletope i le telefon, na ia fa’aaataata mai ai se fautuaga, tatou te ono manaomia le taoia o le teine e i tatou.”

“Sa ou masalosalo na te taumafai e fai se mea faapena.”

I tua atu o Iuri, na matala mai ai le faitoto’ā tau atu i le isi ofisa. Na ia lagona atu o faafeiloa’i e Fomai Seni se isi tagata, i le leo ma’ai ma le aloaia.

Na faliu i tua Iuri, ma na segia lona mauli i le vaai atu i le tagata o loo ogatotonu i ai la la’ua talanoaga, o

loo tu mai le faitoto’ā. O foliga faatosotoso o Mapeletope sa pei ua atili ona toulu. O se lagona afu mālūlū na pei e sosolo i le tino atoa atoa o Iuri. Na tula’i i luga Makepalai. “Ioane, na se’i o matou talanoa nei ia te oe. Na manuia sailiga a lau vaega- au ina ia maua le ulupoo ua faateteleina lona tāua?” “E leai. Ua uma ona matou su’eni uma i luga fale mataaga e lua.”

“E tulaga ese,” na fai atu ai Makepalai ma le popole tele o ona foliga. “A o le a se tala i le teine?”

“O loo feoa’i solo helikopa e vaili le aai atoa, i ona vaega taitasi, amata mai le pa manu. E lē o maua mai ni tali mai masini e su’e ma sailiili ai auala ma faailoilo.”

Na taulimata’i tuliloa e Iuri le vaega mulimuli o le saunoaga. “Masini e su’e ma sailiili... o a masini?”

Na taamilo ane Makepalai i autafa o le kesi. Na aapa atu lona lima ia Iuri, o loo tapuni le moto – ona ia tatala lea o lona alofilima e faailoa ane se mea itiiti o loo i le alofilima.

E telē itiiti atu nai lo le ulu o se pine faamau.

Na taumafai Iuri e fālō atu lona ulu ma faalagolago ina ia na iloa lelei.

“O mea ofoofogia o le nanotekonolosi,” o le tala lea a Makepalai. “O se mea faasalalau faaonaponei e talia gofie, o i ai ma ona enetena faaleitiō ma lona maa o loo afifi faatasi ai. Ao o’u i ai i le Uarenī i la’u asiasiga mulimuli, na ou tuia uma ai tamaiti ma totō ai le mea faasalalau lenei.”

E le’i iloa e Iuri se tala faasino i nei tui na fai i tamaiti; ma na te le’i iloa lava le tele o mea na tutupu.

“Na faataga e Savina nei mea faasalalau faatonutonu?”

Na ia tepa a’e ma maua Makepalai o ‘eu a’e ia i le tasi tulilima. Sole, e mautinoa e sili atu lou atamai nai lo le fai o lena mea, Fomai Raeva, e pei o lana tala lea o tau fai atu.

Na mate’ia e Iuri le mataupu o loo tau fa’ālo’alo atu e le Amerika. E le’i iloa faatasi e Savina se mea o lenei mataupu. O Makepalai na ia tuia tamaiti – fai faalilolilo aunoa ma le silafia e se tasi. Sa tele ona avanoa e mafuta ai ma tamaiti, a e sa mata’ituina ma leoleo lelei. Na iloilo lelei e Iuri le telē o le mea faasalalau. O lona itiiti e mafai ai ona fela’ua’i ma kiliva solo i auala eseese faitau selau.

Aisea o le a tago ai Makepalai – ?

Na vave ona faataamilo i le mafaufau o Iuri le tele o mea e mafai ona tutupu, o le faauigaina o mea, ma le i’uga e oo mulimuli i ai. E lē taumate ua tuu e Makepalai auala faasalalau nei i totonu o tamaiti uma.

Pe afai ua totōina ai, pau lava le mea na te fai, o le faatuina o se vaiga talafeagai, e uuna'ia ai se toatasi pe sili atu, e tuua le faamoega.

Na pu'e e Iuri le ata o foliga o Atipale Poleki i lona mafaufau. O lona manatunatu atili i le aotelega o mea o tutupu, na taia ai o ia e pei o se tui i le ogatotonu o fesootaiga o neura o le manava ma le pute.

"Ua na o se togafiti mai lava i le amataga," na mapuea a'e ai Iuri. "Le solaaga a Foma'i Poleki..."

Na ataata Makepalai i lona lagolagoina. "Lelei tele." Na faamalumalu ifo le ataata o Mapeletope ia te ia pei o se u'amea mamafa na'uā.

O Iuri sa lavea i le taufaavalea. Na ia tilotilo atu ia Makepalai. "Sa e i ai i le Uareninina ua sola Atipale. Na e fesoasoani e faasola ia te ia."

Na lue mai le ulu. "Sa matou manaomia se auala e tata'i ane ai i fafo i le laolao, se tasi o a outou sui autū o le Omeka."

"Na outou fa'aaogā Foma'i Poleki e pei o se māunu. O la outou uo ma le paaga."

"O se mea tatau, e faamalie atu ai."

"Na ia...na iloa e Atipale o loo fa'aaogā o ia?"

Na mapuea Makepalai ma se tigā lē lava i lona leo. "Ou te manatu sa ia masalomia...e ui ina sa le'i i ai se avanoa e fai ai sana filifiliga. O le otu pe savali le ala o faamasinoga ma faasalaga. O nisi taimi e faatinou tagatanuu moni, pe e te mana'o i ai pe leai. Ma ou te tautino atu sa lelei lana faatinoga. Toeitiiti lava a ia laasia le laina sikoa."

"O nei mea uma, ina ia ave faamalosi le tamaitiiti e toatasi?"

Na ōloōlō e Makepalai le pou o lona isu. "Na matou masalosalo lava sa i ai se mea na outou nanāina alii, outou le au Rusia, a ea?"

Na taumafai Iuri e tumau pea ona foliga mai le sua. E sa'o Makepalai, a e na te matuā lē iloa le loloto o le mea na latou natia.

"O le a matou fa'aaogāina le tamaitiiti lenei," na ia fa'aauau ai, "e amata ai la matou lava polokalame iinei i le Unaite Setete. Ina ia su'esu'e atili ma aulili mea sa outou faia i le tama ititi. E ui ina tele a matou faafesili fai fai pea, a e sa le mafai e la outou faalapotopotoga ona aumai se tali atoatoa. Sa outou taofiofia faamatalaga tāua mai lava i le amataga."

Ma o le mea moni lava lena – e lē gata i faamatalaga ma faamaumauga, a e faapea foi i fuafuaga mo le lumana'i.

Na fesili atu ma le leo tele Iuri, "E faapefea fualau a Sasa?"

"O le a matou taumafai i ai. Faatasi ma la outou fesoasoani."

"E lē taitai."

"Sa ou fefe ma popole o le a e saunoa mai faapena." O sina filiki o le mata o Makepalai na tosina atu ai le vaai a Iuri i luga o lona tau'au.

Sa uu e Mapeletope se fana i lona lima.

Na ia soona fana tutu'i le auupega.

9.45 afiafi.

O Karai o se tagata e lē gafatia mea e fetaui le tutupu faatasi. E to'a lua saienitis i sa galulue i le poloketi e tasi, ua faafuase'i ona leiloloa i le taimi e tasi – a e te'i ua mānu a'e le tasi i Uosigitone, ua uma ona vailau faaleitiō ma ua i le faitoto'a o le otu.

Na valuvalu e Karai se tigā i tua o lona manifinifi. "Elisapeta, o mea uma nei e fesoota'i uma i tua i le ulua'i su'esu'ega na amata e lou tamā."

Na luelue le ulu o Penita. "A o le fesili, e faapefea? Pe ana tatou maua nisi faamatalaga aulili...atonu po o ni mea e lē o faamauna e lou tamā."

Na tāupe ai le fesili lena i luga o le 'ea.

Na vaai ifo Elisapeta i lalo i ona vae. O ona lima ua matuā pipii 'u'u mau faatasi. E peisea'i na ia faato'ā iloa ai le mamafa o le vevesi o i ai, ma faa-matagataga ai ona tamatama'ilima ma tau fālōlō.

Na ia tomumu teisi. "Ou te le iloa. O nei tausaga talu ai...ma te le'i talanoa tele. Sa le'i fiafia o ia ina ua ou su'esu'e i tagata ma manu. Sa ia mana'o ou te mulimuli atu i lana..." Na lūlū lona ulu.

"E le afaina."

Na aapa atu Karai, liligi le ipu kofe ma tuu atu ia te ia. Na talia mai e le tamaita'i ma le luelue o lona ulu. Na te le'i inumia, a e sa na o le 'u'u i le va o ona alofilima, ma faamafanafana ai.

"O lou tamā e peisea'i e le'i matuā fiafia i lau filifiliga sa fai mo lau galuega," na fai atu ai Karai. "Sa ia aumaia le avanoa su'esu'e lena mo oe i le fale mataaga i Eleni."

Sa lūlū lona ulu. "O lana fesoasoani mai e le'i matuā atoatoa e pei ona foliga mai ai. O lo'u tamā sa sili ona fiafia i le Perofeta faa-Telefaia. O perofeta fafine na sa noanoa i ana su'esu'ega e uiga i lagona ma faalogona. Sa talitonu lo'u tamā sa i ai se mea uiga ese i nei fafine, o se mea sa latou faasoaina. Se mataupu e tutusa ai faa-kenera. Poo se faasoaga o faalētonu o neura. Ua tou iloa la, na aumai e lo'u tamā le avanoa lena mo a'u i Telefaia, ina ia ou lagolago ma fesoasoani atu ai i ana su'esu'ega."

(Soso'o atu i le Sulu Samoa Setema 2022)

LAUGA, ‘TAEAO FOU’

(O le Lauga a le afioga Taitaifono Fono Tele, Iosefa Atapana Uilelea FT, le ta’ita’i o le sauniga lotu ‘Taeao Fou’, Sapapalii 24/8/22)

Tusi Faitau (TFA): Failauga 9: 13 - 18

Matua: Failauga 9: 14 & 15, “¹⁴O si aai itiiti, e toaitiiti foi tagata na i ai; na alu atu foi i ai le tupu tele, na ia vagaia, na ia fai foi ‘olo tetele e faafeagai i ai; ¹⁵na iloa ai foi le tasi tagata mativa, a e poto; na ia faasaoina foi le aai i lona poto; a ua leai se tagata na ia manatua lea tagata mativa.”

MANATU AUTU: ‘APO’APO ASO (SEIZE THE DAY).

O ta’ua i le Tusi lenei a le Failauga, se aai itiiti ma le to’agaogao. I lea aai, sa taumafai se tupu malosi na te pulea. Sa i totonu o lea aai itiiti se toeaina mativa, a e poto. O lona poto lena, na faasaoina ai lea aai. A o le faanoanoaga, ua faasaoina le aai lea, a e leai ma se tagata, na ia manatua si toeaina mativa, aemaise le mea na ia faia. Ua inoino tagata i lona poto, ma ua le fia faalogo lava se isi i ana upu.

O Samoa anamua, sa leai ni igoa o ona Aso, se’i vaganā se mea tāua na tupu, ona ‘apo’apo lea o lena aso, ma ta’ua o taeao, ina ia manatua pea. A o ‘apo’apo e Samoa o latou aso ma taeao, pei o le taeao nai Sauā ma le aso nai Namō, a e manu a’e loa le aso fou ua ta’ua: O LE ULUA’I TAEAO O LE TALALELEI. O le upu moni, na faigofie le faatuina o lenei TAEAO FOU i Samoa. Aisea? Ina ua taunu le Tala Lelei i Samoa, a ua fasia le toa malosi po o le aitu tagata o Tamafaiga. Na osooso ai Faueā i luga o le vaa o le Savali o le Filemu, ma fai ia Ioane Viliamu, “Viliamu, ua mate le tevolo.”

I le aso lenei - 24 Aokuso 1830, na fesilafa’i ai Malietoa Vainuupo, ma ulua’i misionare Peretania na ta’ita’i mai e Viliamu ma Papu. Na saunoa Ioane Viliamu i lena fesilafaiga: “Ma te le’i o mai e saili ni ‘oa o le lalolagi, leai; a ua ma fia aumaia i lenei atunu, le malamalamā ma le poto i le Atua moni. Ua ma fia tuuina atu foi ma A’oa’o e tala’i atu le Tala Lelei ma fai sauniga lotu.”

Na malele faafetai lea o Malietoa, “O le aso manuia lenei o lo’u olaga, ma ua ou fiafia lava, ina ua ou iloa lenei aso; ma ua talia e Samoa le lotu fou.” Na saunoa foi Malietoa i ona tagata, “Samoa, ou te tapuai i le Atua soifua, e ui ina o le a lilivau

mai o’u atua ia te a’u, i lo’u tuulafoa’i ia te i latou; a e o le a puipui a’u e Ieova. Ia i luga ia te a’u lo latou taui ma sui, a ia ola Samoa. O la’u mavaega lenei Samoa e, ia ou alu ifo i le eleele ma o’u mamalu, a e tafatasi paia ma mamalu, i le Atua moni o Samoa.”

Ioe, o le tofa lena a le toeaina mativa, a e poto. O le tofa a le toeaina e alofa i si ona nuu itiiti ma le to’agaogao. O le tofa atamai a le ta’ita’i faatuatua, ua talitonu lona loto, a folau Samoa ma le faatuatua i le Atua moni, o le a manuia lona lumana’i. Na tuua e ulua’i misionare Samoa, seja toe foi mai mulimuli ane. Na matua ofo ma faate’ia i latou, ua vaaia, ua tutū falesa tetele, lanu papa’e ma maualuluga. E ui ina matitiva ma to’agaogao Samoa i na aso, a e sa mafaia galuega tetele ma le matagofie, ona o le faatuatua i le Atua.

Avea lenei avanoa e momoli atu ai le faafetai a le Ekalesia Faapotopotoga Kerisiano Samoa i lo tatou Malo. Lau afioga i le Ao mamalu o le Malo o Samoa ma lau masiofo. Afio lau afioga i le Tamaitai Palemia ma le Kapaneta. Le afioga i le Fofoga Fetalai ma le mamalu o le Palemene o Samoa. Faafetai i le tofa ua a’e - se’i toe ‘apo’apo le ulua’i aso ma le ulua’i taeao fou o le Tala Lelei - le ‘Taeao nai Mataniu Feagai ma le Ata’. Se’i toe ‘apo’apo le aso, na amata folau ai Samoa ma le faatuatua i lona Atua, e tapua’i i ai, e ave uma i ai viiga ma mamalu. Se’i toe ‘apo’apo le aso, na amata faa-kerisianoina ai tu ma aganuu a Samoa. Se’i toe ‘apo’apo le aso, na amata ai ona ola Samoa i uiga sa’o, ma aga sa’o faaleAtua (Christian morals).

O le upu moni, o le aso lenei pei ona ta’ua e le susuga Esera A. Esera FS i le tala o le Taeao Fou, e lē se aso na faia e Sapapalii mo Sapapalii, e leai. E lē se aso foi na faia e le EFKS mo le EFKS, e leai lava. A o le aso, na fai e le Atua mo oe Sapapalii, mo oe le EFKS, mo oe foi Samoa.

Le aso lea, na malele ai Iesu i luga o le satauro: “Ua fai lenei mo oe.” Le aso o le faaolataga. Le aso lena, na momoli mai e misionare, mafua ai le aso lenei, ua ta’ae’ae ai i manuia o le faaolataga. A e lē itiiti lava le agaga faafetai, ina ua toe ‘apo’apo le Aso lenei, aemaise, e i ai le mea faanoanoa ua tupu, e pei ona ta’ua i le tusi o Failauga.

E lē natia, ua toatele tagata Samoa, ua latou lē manatua le poto o si toeaina mativa, lea na ia taliaina ai le aso lenei, ma ua latou lē fia faalogo i ana upu. A o le mea e sili ona leaga: E oo a i nisi o aiga o si toeaina, o nisi o lona nuu, ma lana Ekalesia, ua latou

lē manatua, ua lē fia faalogo foi i ana upu. E toatele foi ua taumafai e fao le mamalu ma le pule a le Atua. Samoa e, o le fautuaga a le Poto o Solomona: E sili ona e faalogo i upu filemu a e popoto, a e ‘aua e te faalogo i le tuualaga a faipule valea. E sili ona lelei ma malosi o le poto, nai lo le malosi o au’upega o le taua. E maumau foi mea lelei e tele i le tagata agasala, a e lē iloa salamō. Lo’u atunuū e, folau ma le faatuatua, e pei ona sa folau mai ai o tatou tua’ā, lea ua ta ‘ae’ae ai i manuia o le TAEAO FOU O LE TALA LELEI, na latou talia.

O le upu moni, afai e galo i se Samoa le TAEAO FOU lenei, o lona uiga ua gallo foi ia te ia le Atua. O la Paulo, “*Afai e ‘au ma i tatou le Atua, o ai se faasagatau mai?*” Samoa e, TOE ‘APO’APO MAILE AGAGA o le ulua’i aso o le TALA LELEI i ou fanua, ne’i faamea to i vao manuia ua i ou aao ma o tatou lima. Ia faamanuia mai le Atua i le faamanatuina o le 192 tausaga o le Tala Lelei i Samoa, ua avea o se vaega o le faamanatuina o le 60 tausaga o le Tutoatasi o lo tatou atunuū. Ona o Iesu. Amene.

(*Saunia: Rev Elder Iosefa Atapana Uilelea*)

MAILE TUSI FAITAU ASO

Aso Sa, 21 Aokuso 2022.

Tusi Faitau: Failauga 6: 1 – 12

Matua: “¹⁰*O le ua i ai nei, ua uma ona faaigoaina o ia i lona igoa, ua iloa foi o ia o le tagata...*”

Manatu Autu Vaiaso: O le Atamai e Sili Atu Nai Lo le Malosi. Manatu Autu Aso Sa: Avea ma Tagata

Na ta fia iloa, pe aiseā ua lē mafai ai ona faa-Samoa le upu ‘human being’ i se upu nonō e pei o isi upu e i ai le bus – pasi, pick up – pikiapu, spoon – sipuni. A e ai lava o le tofa loloto ia i tamā na faaliliuina le Tusi Paia, e faaSamoa le upu ‘human being’ i le upu ‘tagata’. O se tasi o mau e faapea, auā sa tutusa lava le tino o le manu o le gata ma i tatou, a e ua faailoa foi i tala o le faatufugaga paia a le Atua mai le amataga, le poto tele ma le atamai o le manu lenei o le gata. A e talitonu ua lau silafia foi le fetu’u, ma le faamalaiaina na tu’u i ai e le Atua i le amataga i le gata, e pei ona i ai le tala i le uluai tagata ia Atamu ma Eva, na afua ai ona leai ni vae ma lima, a e ua sosolo i lona manava e oo mai i nei ona po.

Ma e pei o iina na afua ai, mafaufauga o le faaliliuina o le upu ‘human’. Ona faapipii lea i ai ma le upu amata i le gata o le ‘ta’, o le mafaufauga e faapea, ina ia iloa ai e sili atu le tagata nai lo le manu o le gata. A mafaufau toto’ a la i ai i le feau o lenei aso – Avea ma Tagata. E pei e foliga o le feau o le Tala Lelei, o se faamanatu mo tagata, afai sa sili le poto ma le atamai o le gata, e leai la e silisili atu lava le iloa ma le poto o le tagata. Ia pe faapea foi, ona ua i ai i latou ua atamamai faa-gata, a e ua lē poto faa-tagata. A e o le ā le atamai faagata? O le taufaosooso, taufaasesē, taufaavalea, faatosina, o le susua o upu faatauanau, ma isi uiga faapena e tele.

O le Tusi o Failauga e lavea i tusitusiga a le Poto, ma ua talia lautele lava e le au Iutaia, o le Tusi na tusia e le tupu poto o Solomona. Peitai o le mataupu lea e 6 e pei ona faatatau i ai lenei aso, e i ai foi talitonuga i faiaoga o le Feagaiga Tuai, e le’i tusia e Solomona. A o i latou ua ta’ua o Cohele (preacher) o ē a’oa’o i le Tusi Paia. Auā o lea ua tatou faitau i ai, e pei e lē talafeauga ma le gasologa o le soifuaga o Solomona. Ma e faapea, e faitau faatasi le mataupu lenei e 6 ma le Tusi a Iopu. Auā e tutusa lelei mafaufauga. I le lagona e tupu ai ni fesili faapea. Afai o le tagata amio lelei, a e aisea e tutupu ai fita ma lē au manuia ana taumafaiga, a o le tagata ola leaga, a e faamanuiaina ma sasaa i ai e le Atua le tamaoaiga i ona lima? Ma e faapena mafaufauga o loo taoto i le mataupu lea e 6 e pei ona faitauina.

Mo Solomona i lana faatofalaiga faatupu, na ia faia ai faamasinoga amiontu mo lona nuu, na ole foi i le Atua i le poto na te faia ai faai’uga tatau, na afua ai ona faapea le Tusitala, e pei ua ofo le Atua i le ta’ita’iga a lenei tagata, auā ua lē ole atu mo le tamaoaiga ma le ola tulu’i, a e o le poto e faia ai faai’uga tonu mo lona nuu. A o mea tetele ia e tolou lea e talanoa ai le mataupu 6 – o le tamaoaiga, o le mamalu, ma le ola manuia.

E mafai la ona faapea, Avea ma tagata poto. Tagata poto e fuafua tatau lona tamaoaiga, tagata poto na te pulea lona mamalu, tagata poto e afua ai ona ola manuia, ma tau i manū ana taumafaiga uma. Auā e pei o lea ua ta’ufaatauvaaaina ia mea e tolou i le faiatuga o le asō, ona ua faasili e le tagata le sailiga o le tamaoaiga nai lo le Atua. Ua avea foi le mamalu ma tofi taualoa ua faamaualuga ai le loto, a e ua galo foi le Atua. Ina ua se’ei i manuia o le ola, ua galo le afuaga o ia mea uma. O le ala lea ua pei ua ta’u faatauvaaaina ai ia mea i le vaai a le poto, ma ua pei ua lē aogā ia mea i le ola, ma ua toe lilifa ai i le tasi o

talitonuga faa le Feagaiga Tuai - Ia finafinai i mea ia a o maua le ola ma le malosi, auā e leai se ola faavavau, e uma loa le olaga nei, o le afi i Seoli. A o le afuaga foi lea o le vaogagana e faasino i tuuaiga o le aso, mana'o tele, le ola e lē faamalieina po o le eelele e lē malie i vai, mana'o lasi, losilosivale, ma le tele o upu e faamatala ai ituuaiga tagata faapena.

Lea ua faatusa ai le tagata e tele le tamaoaiga, ma le oloa e tele, a e lē 'ai ai, a e ese le tagata na te fa'aaogāina. Ua pei o le tagata sa tigaina e tulī lana manu, a e ese le tagata ua 'ai ai. Ma ua faaigoaina o le ma'i valea lea mea. Ua faapea foi i le tagata e to'a selau lana fanau, a e lē malie i ai, ma e oo ina leai sona tuugamau e elia, o lona uiga o le tagata e oti, a e lē iloa po o fea o oti ai, ua lē pū lona eelele mo ia, fai mai le poto ua sili ai pe ana fanau lē au. Ma ua lē maua lava se fiafia o le loto, ma e foliga e sa'o ai le upu, e sili si mea manumanu e maua ma le filemū.

Fai mai upu ua fai ma matua, "O le ua i ai nei, ua uma ona faaigoaina o ia i lona igoa, ua iloa foi o ia o le tagata." Ua uma ona tapena e le Atua lo tatou faasinomaga o le ola. Ua tofutofusia foi i tatou i Lana faasinoga agalelei, i o tatou tofi ma tiute ma soo se valaauina, ina ia iloa ai, o tatou lava o tagata, na faia i le faatusa paia o le Atua, o tatou lava o tagata ua faatotogaina i le poto mai Lana afio, o tatou lava o tagata ua pale ma laei i tamaoaiga faasoa mai e le Atua. Ua i ai lou suafa, le igoa na faaigoaina ai oe ma papatiso ai mai lou tamaitiiti, ua faapaleina foi oe i se suafa taualoa, i tiute ma tofiga mamalu, o i ai foi le igoa ua iloa ai oe. O la le Failauga, ua uma ona faaigoaina oe, ma ua iloa foi o le tagata.

Le paia o le Ekalesia ma le nuu o le Atua, o lena le faamanatu a le Tala Lelei, ia avea ma tagata poto, avea ma tagata atamai, avea ma tagata e tu'utu'u mamaao le tofa ma le faautautaga, a e sili ai, ona avea ma tagata e faamua le Atua i mea uma e manatu i ai. Na galo i le uluai tamaloa o le lalolagi lona igoa ma lona uiga. O ia o Atamu, o le uiga o le eelele, le tasi upu e tutusa ma le eelele o le palapala, a o le palapala lea e igoa ai le toto lea o loo tatou ola ai. E afua ai le sootaga i le uiga o Eva, o le ola. A tele le toto po o le palapala e alu ese ma o tatou tino, ona uma lea o le ola. Peitai, e ui ina galo, a e na toe i ai le Atamu fou, e ala i le afio mai o Iesu Keriso, se'i toe aumai le ola fou ma le poto atalī. Ma avea foi o ia ma tagata, na militino faatasi ina ia ola lava le tagata. Avea ma tagata ia Keriso Iesu. Amene.

Saunia: Susuga Isaako Sefo FS

EFKS Letui, Matagaluega ITU O TANE

O E UA FAI I LAGI LE FOLAUGA

NAITUA KOME FUI MEAFOU

4/3/1941 – 20/7/2022 (81+4+17)

"*O mea uma ua e iloa e faia e ou lima, ina faia ia ma lou malosi; auā e leai se galuega, po o se mafaufau, po o se iloa, po o se poto i le tuugamau, o loo e alu atu i ai.*" Failauga 9:10

O le tina matua o Naitua Kome Fui Meafou o le Ekalesia i Tanoalei'a, i le Pulega Vaimauga i Sisifo, na soifua mai i lona nuu i Samauga i le Aso Lua, 4 Mati 1941 a e na valaau lona Matai mo ia i le Aso Lulu, 20 Iulai 2022. Ua 81 tausaga, 4 masina ma aso e 17 lona soifua. O ona tua'ā o Kome Maiava Alatimu ma Lalokava Faalelei Lolesio Sooalo. O ia o le lona lua o le fanau e to'a iva. Na soifua ma ola a'e i Samauga. Sa faaipoipo atu ia Fui Meafou, e to'a 8 le fanau, 38 fanau a fanau, 21 fanau a fanau a fanau; e to'a 9 fanau fai. O molimau a aiga o Fui Meafou faapea foi ma aiga o le tina, o ia o se tagata sa fai le galuega tele o le tautuaina o aiga e lua. O le sami ma le vao, sa faamoemoe ia i la'ua i lo la malosi. Se'ia oo i le tausaga 1990 ona malaga mai lea ma nonofo i lo latou fanua i Tanoalei'a, Vaivase uta, ma fai ai la latou Matāfale i lea lava tausaga i le Aulotu i Tanoalei'a. O le tausaga 2001 na maliu ai le tamā ia Fui Meafou, o loo lagomau i lona aiga i Samauga. O Naitua o se tasi o tina matua o lenei Aulotu, e faatuatuaina ma faamoemoeina i le tele o mea e fai a le Aulotu. A o se tina loto maulalo ma agamalū, e lē lagona lona leo, a e lagona lona auai i mea e fai ma galuega faatino i totonu o le Aulotu. O se tina to'aga i le Lotu i le Aso Sa i taeao ma afiafi, faapea foi Sauniga Lotu o le Au Leoleo i Aso Lulu. E faamaopoopo i le Mafutaga Tina ma mea e fai, ma o se isi o le au matutua e saili i ai le siliaga, o le tofa auā le atina'ega o le Mafutaga Tina.

O lona sauniga faaleiga sa ou ta'ita'ia i le fale maliu o Pa'u Sefo Pa'u. Sa molimau ai lana fanau, o le usoga, o ona aiga, i le soifua osiaiga o lenei tina. Sa faamoemoe ia te ia mea uma lava o le osiosiga o

(fa'auma itulau 15)

O E UA FAI I LAGI FOLAUGA

TUPOU AINUU TANIELU

1/10/1971 - 8/8/2022 (50+10+8)

O le susuga i le Faafeagaiga taulagi o le EFKS Nofoalii, Aana. Na soifua mai i le Aso Faraile 1 Oketopa 1971. Na faaipoipo atu ia Luisa Bethlene Taefu. E toa 4 si a la fanau a e toa 3 fanau a fanau. Na a'oa'oina i le Apia Primary School, Avele College, Samoana College i Amerika Samoa. Sa faigaluega i le Matagaluega o Leoleo. Na ulufale i le Kolisi Faafafeau i Malua i le tausaga 2007, ae faaiuina le taumafai i le tausaga 2010.

O le aso 26 Iuni 2011, na Osi Feagaiga ai ma le Ekalesia i Nofoalii i le Pulega a Alofi o le Matagaluega a Aana. O le aso 8 Aokuso, na faamanavaina ai e le Atua ana feau, i le vaveao. O le Aso Sa 21 Aokuso i le itula e 2 i le aoauli, na aveeseina atu ai lona tino maliu, ma faia ai lona sauniga faaleaiga, i le malumalu EFKS Nofoalii. Na taitaia lena sauniga e lupe faalele ma fanau talosia o le nuu na auai. O le aso Gafua 22 i le itula e 9 i le taeao, na faia ai ona toe sauniga. Sa taitaia lava e le susuga i le Tama Toeaina, Rev. Elder Ailepata Leuta. Na faaulufale lona sa e le susuga ia Mose Galuvao FS. O Eric Mulitalo FS sa feagai ma talosaga, a o le susuga ia Simona Avaoi'a FS, sa faia le lauga, o a'u sa faia le molimau a le Pulega. O saafiafiga mo le uso, ua manatua ai le upu taua a le alii uli o Martin Luther King na ia faapea ai: "E le o le umi ona e soifua ma ola, ia po o le puupuu foi o ou aso, o le taua lea; Peitai o le mea pito i sili ona taua, pe na faafefea ona e olaina lou ola."

Faapea upu o le solo na ou tau ane ai:

Not, how did he die, but how did he live?

Not, what did he gain, but what did he give?

These are the units to measure the worth
Of a man as a man, regardless of his birth.

Nor what his church, nor what was his creed?

But had he befriended those really in need?

Was he ever ready, with words of good cheer,
To bring back a smile, to banish a tear?

Not what did the sketch in the newspaper say,
But how many were sorry when he passed away?

O le sootaga faa-uso ua motusia nei.

E leai lava se isi mea na te toe mafai ona faalelei.

Peitai o le Atua na te aamia atu tatou taitoatas.

Se aso ma se taimi o i luma, o le a tatou toe sosoo
ai ma mafuta faatasi.

MANUIA LAU MALAGA KING TUPOU.
*Saunia: Susuga Tunupopo Patu FS
Failautusi Pulega Alofi, Mata. AANA*

Susuga POPO SU'A FT

3/3/1944 – 4/8/2022 (78 + 5 + 2)

Filipi 3:20 "A o lo tatou nuu moni ua i le lagi lea, o loo faatalitali mai ai i tatou i le Faaola, o le Alii o Iesu Keriso".

O le susuga ia Popo Su'a o le Faifeau Toeaina Penisione Malōlō manumalo mai le EFKS Ketesemane, Pulega Ueligitone Matu, Matagaluega Niu Sila i Saute, sa galulue ai ma le Tinā Malōlō manumalo ia Epenesa Su'a. Na soifua mai o ia i le Aso Faraile 3 Mati 1944, a e na faamānavaina e le Atua ana galuega i le Aso Tofi 4 Aokuso 2022, ona o se gasegase faigata sa feagai ma ia. O Popo Su'a ma le faletua ia Epenesa, e mai le EFKS Gagaifolevao, Pulega Lefaga ma Faleseela, Matagaluega Aana.

O le tausaga e 1965 na ulufale ai Popo i le Kolisi Faafafeau i Malua ma faaiuina ai le taumafai i le tausaga e 1968. O le amataga foi o le tausaga lava lea na faaipoipo atu ai o ia iā Epenesa Su'a, o ona mātua e mai le Motu o Tuvalu, i le Aso 13 Ianuari, 1968. O le tausaga e 1972 – 1978 na valaaaina ai i laua e galulue i le EFKS Porirua, Pulega Ueligitone Mātu, Matagaluega Niu Sila i Saute. O le 1980 – 1990, na toe amataina ai le isi galuega fou a le susuga ia Popo Su'a ma le faletua ia Epenesa ina ua vaeluaina le Ekalesia i Porirua ma faatuina ai loa le la Ekalesia fou, ua igoa o le EFKS Ketesemane, ma galulue ai loa mai le 1990 – 2014. Sa avea Popo Su'a ma Faifeau Toeaina o le Pulega Ueligitone Mātu, ma avea ma Toeaina Faatonu o le Matagaluega Niu Sila i Saute, po o le Matagaluega Laumua o Aotearoa e pei ona ua i ai nei, seia oo ina Penisione ma malōlō ai i le Fono Tele ia Me 2014, ma agai mai ai loa ma galulue i le EFKS Gagaifolevao, seia oo ina faamānavaina e le Atua ana galuega.

O lona sauniga faale-aiga sa faia i le Malumalu EFKS Gagaifolevao, Lefaga, i le Aso Gafua 15 Aokuso 2022 i le itula e 2.00 i le aoauli, o a'u sa ta'ita'ia lea sauniga ma faia le upu faamafanafana, o Malaesilia Vaesavali AF sa fatauina le Tusi Paia, ao Malaesilia Letalie AF sa faia Tatalo. Na auai le Tinā Malōlō ia Epenesa ma le fanau, o aiga ma le Ekalesia i Gagaifolevao, faapea nisi o le aufaigaluega totofi a

le Atua, susuga i faafeagaiga ma faletua, o le Toeaina Faatonu, Matagaluega Malua susuga ia Fili Sia Matalavea (EFKS Faleula), ma nisi o Toeaina Penisione ma faletua na auai i lea sauniga. Ona molimoli atu lea o lona tino maliu i lona maota i Vaiana i Gagaifo Lefaga mo leoleoga o le po. Ina ua mae'a leoleoga o le po, ona toe molimoli ai lea o lona sa i lona maota i Tiapapata ma tōfā ai mo le aso e sosoo ai.

O ona toe sauniga sa faia lava i le Malumalu EFKS Gagaifolevao, Lefaga na laua galulue ai ina ua malōlō mai le galuega. O le itula e 10.00 i le taeao o le Aso Lua 16 Aokuso 2022 na faataunu ai lea sauniga mamalu, na auai le afioga le Taitaifono Fono Tele, o le KMTA Matagaluega Lotofaga Lepa ma Aleipata susuga Iosefa Atapana Uilelea FT, o le Ao Mamalu o le Malo Tutoatasi o Samoa, lana afioga Tuimalealiifano Vaaletō'a Sualauvi II, o nisi o le aufaigaluega totofi a le Atua, susuga toeaina, o le Komiti o Faletua Au Toeaina, o tamā ma tinā penisione, o faafeagaiga ma faifeau ma o latou faletua.

O le Toeaina o le Pulega Lefaga ma Faleseela, susuga Nomeneta Simanu FT na ta'ita'ia le sauniga. O le susuga i le Failautusi o le Pulega, o le failautusi foi o le Matagaluega Aana susuga Tuitoga Leota FS, na ia faaulufaleina le sa o le Tamā malōlō, o le susuga Iaeva Amitai FS na fatauina le Tusi Paia (Salamo 56:8; Fa'aaliga 5:1-5), o Tatalo na saunia e le susuga Keneti Leaupepe FS, o a'u sa faia le molimau faaleagaga o le Tamā Penisione i lona soifua galue i Gagaifolevao, a o le Toeaina Faatonu o le Matagaluega Aana, susuga Ailepata Leuta FT na faia le molimau a le Matagaluega, o ia foi na fai ma sui o le Komiti Au Toeaina e tauaoina le meaalofa a le Komiti Au Toeaina mo le tuumalo o le susuga i le Tamā Penisione ia Popo Su'a FT.

O le susuga Esaroma Fatilua FS na faia le lauga ma le upu faamafanafana mo le tinā malōlō ia Epenesa ma le fanau, le Ekalesia i Gagaifolevao, o aiga ma uo uma sa auai i lea sauniga mamalu. Na faavae le upu faamafanafana i le Manatu Autu faapea: O LE ATUA UTU LOIMATA, e tusa ma le tatalo a Tavita ina ua itagia o ia e tagata, lea na ia faapea ai i ana upu na fai ma matua: "Ua e fatauina lava lo'u fesolasolatai; ia e utu o'u loimata i lau fagu; e le o i ai ea i lau tusi? (Salamo 56:8). E peiseai o loo

faapea atu Tavita i le Atua: Ia e utu o'u puapuaga i lou Alofa Tunoa tele. O le toeaina ia Nomeneta Simanu na faia le molimau a le Pulega, ma faaiuina lea sauniga mamalu. Ona molimoli atu lea o lona tino maliu e lagomau i lona oliolisaga tumau i lona fanua galue i Gagaifo Lefaga, o a'u sa feagai ma lea sauniga. "Le auauna lelei e, ma le faamaoni, ulufale mai ia i le fiafia o lou Alii". Ia manuia lau malaga Tamā!

*Saunia: Susuga Francisco Fatu FS,
EFKS Gagaifolevao,
Pulega Lefaga ma Faleseela,
Matagaluega AANA*

NAITUA KOME FUI MEAFOU

4/3/1941 – 20/7/2022 (81+4+17)
(mai le itulau 13)

latou aiga. O lona toe sauniga sa faia lava i le malumalu o le Ekalesia Faapotopotoga Kerisiano Samoa i Tanoalei'a. O le Susuga Tanoalei'a Tunupopo FS, le faafeagaiga taulagi a le EFKS Leusoalii, sa na faaulufale mai le sa o le tina, ma saunia le tatalo. O le Toeaina Siolo Tauati FT (Apia-uta) na fatauina le Tusi Paia ma saunia le Upu faamafanafana. Sa molimau lona uso o Hana Kome Sooalo Siaki mo le aiga ma le usoga. O le alii o Fetausia'i Faavae na fai ma sui o fanau a fanau e molimau i la latou mafutaga ma le tina. O le tamaitai Tiakono o Mutaaga Meafou safai ma sui o le fanau e molimau i la latou mafutaga. O a'u na saunia le molimau faaleagaga o le tina. Sa 'au'au i le mafaufauga faaleagaga o lena aso - O le tagata malaga lē mālōlō. A e i ai lava le aso e mālōlō ai le tagata malaga, ina ua valaau mai le Atua. A o upu a le atunu, 'Ua utu malie faiva o le ta'i afi.' O le magalafu foi sa tutu fausa i ai le fanau, o le tautua foi ua afu, ma ua malie mata i vaai. Sa faai'u ona toe sauniga i lona oliolisaga tumau, i lona aiga i Tanoalei'a Vaivase-uta lava. Ma faatofa atu ai i le Pese faamavae a le auuso Kerisiano, *Talofā uso e, tofaina oe, ua sau le itupo e mālolō...* Tofa soifua Naitua Kome Fui Meafou, ia manuia lau malaga. Tatou te toe feiloa'i foi i se aso.

*Saunia: Susuga Enefatu Lesa FT
EFKS Tanoalei'a, Vaivase-uta
Pulega Vaimauga Sisifo
Matagaluega VAIMAUGA*

POPO SU'A FT (PENISIONE)



NAITUA KOME FUI MEAFOU

TUPOU AINU'U TANIELU FS



Susuga Aila & Valasi Patea FT, susuga
Tinetali Gafa FT i Mataniu Feagai ma le Ata



Sui o Autalavou EFKS sa auai i le Vaiaso Tupulaga 2022